

Goibekokale

ELGETA / Barikua / 2005eko maiatzaren 27a / 228. zenbakia

KOORDINATZAILEA: Irati Agirreazaldegia • Barrenkalea 33 BERGARA 20570 • Tel.: 943 76 03 97 • Faxa: 943 76 29 77 • Posta elektronikoa: goibekokale@goiena.com • Lege gordailua: SS475/95

Plataformak ordezkari-tza eskatu du, udal hauteskundeetatik bi urte pasa direnean

IRATI AGIRREAZALDEGI

Maiatzaren 25ean bi urte bete dira azken udal hauteskundeak izan zirenetik. Herri plataformak legez kanpo utzi zituzten, beraz, ez dute ordezkari-rik Udalean. Hori dela eta, hainbat mobilizazio egin dituzte eta Elgeta Auzolanean plataformak bat egin du deialdiok.

Eguaztenean kontzentrazioa izan zen plazan Elgeta Auzolanean plataformak deituta; "apartheid politikoaren kontra eta eskubide zibil eta demokratikoen alde" izan zen kale agerraldia. Bestalde, plataformak mozio bat aurkeztu du Udalean gai honen gainean erabakiren bat har dadin. Euren nahia da mozio hau hurrengo osoko bilkuran eztabaidatzea.

Elgeta Auzolanean plataformako zerrenda-buru Edurne Alberdiren esanetan, "pertsonek batzuetan ez dagoen postua betetzen dute, eta bi urteren ostean utzi egin behar lukete. Elgetan konkretuki EAJren esku dago hori, eta bada ordua zerbait egin dezan".

Egun, plataformako kideek edozein herritar bezala hartzen



"Apartheid politikoaren kontra" lemapean kale agerraldia egin zuten eguaztenean Elgeta Auzolanean plataformak deituta.

dute parte batzordeetan eta osoko bilkuretan; "erabaki garrantzitsuak hartu behar direnean ez daukagu botoa emateko aukerarik", esan digu Edurne Alberdik.

ARALAR PARTEHARTZEAREN ALDE

Aralarren esanetan eurek beti errespetatu dute herritarrek esandakoa. "Hainbat herritan onartu egin dute EAJ-EAk plataformari

ematea herritarrek emandako erabaki gaitasuna. Gure galdera da EAJri eta EAri, Elgetan zergatik ez? Gai honetan ere argi eta garbi erakutsi dute zein den euren

jarrera: inposaketa eta herritarrek esandakoa ez errespetatzea".

Aralarrek proposatu zuen erabakigune paraleloa sortzea Elgeta Auzolanean Udaleko erabakietan parte hartzeko. "Honek aukera emango luke alderdi bakoitzak herritarrek emandako babesaren tamainako ordezkari-tza izateko. Erabakietan parte hartzeko aukerak badaude, borondatea behar da horretarako. EAJ-EAk Espainiako legeak emandako zinegotziaren botoarekin hartu ditu zenbait erabaki: 2005eko aurrekontuak onartzea, babes ofizialeko etxebizitzak zirenak tasatuak izendatzea..." esan dute Aralarkoek.

EAJ-EA, ESPERANTZAZ

Alkateak EAJ-EAren izenean esan du aukera eman diotela plataformari gai garrantzitsuen eztabaidan parte hartzeko. Gaineratu du; "Elgeta Auzolanean ezin du botorik eman osoko bilkuretan. Hala ere, aire berriek esperantzarako bidea zabaltzen dute. Badirudi Alderdien Legea aldatu egingo dela, eta hurrengo legealdian edo datozen hauteskundeetan edozein alderdik izango duela aurkezteko eskubidea".

EUSKARA

Hika ikastaroan 15 lagunek dihardute

I.A.

Udaleko Kultura batzordeak bulzatutako hika ikastaroan 15 lagunek eman dute izena eta jadanik hasi dituzte eskolak.

Eguazten eta eguenetan batzen dira ikasleak Juan Martin Elexpurrekin. Taldean adin guztietako jendea dago, gehienak gazteak, hika gutxitan egin eta egoki erabiltzen ikasi nahi dutenak.


Hika noiz, nola eta norekin erabili, hikak dakarren afektibotasuna, konplizitatea... ikasi

zuten lehen saioan. NOR-en taulari eman diote erreposoa eta NOR-NORI-rekin ere hasi dira.

HELBURUA, ERABILERA

Hikaren gaineko eskolak jaso ostean, erabilera izango da helburu nagusia; noka eta toka. Emakumeekin egiten den hika nahiko makal dago eta belaunaldi batetik aurrera ez da erabiltzen.

Ikastaroak ekainaren erdira bitartean iraungo du, eta eskolak kultura etxean emango dituzte, eguazten eta eguen iluntzetan.



Juan Martin Elexpurrek emango ditu hikaren gaineko eskolak.

LABUR

Garagardo jaia izango da zapatuan gaztetxean

Bihar, zapatua, Garagardo jaia egingo dute gaztetxean. 19:00etan garagardo kupelak zabalduko dituzte eta 200 litro doan banatu; beraz, gastatu bitartean nahi beste garagardo edateko aukera izango dute gaztetxera gerturatzen direnek. Jaia borobiltzeko 22:00etan hasita kontzertua egongo da. Apunta, Agressive Combat, Last Rebel, Harrikada eta Seme Putiek taldeek jardungo dute eta eurekin batera beste talde sorpresa bat ere izango da.

ERREPIDEAK

Obretan ipinitako semaforoaren kableak moztu egin dituzte

I.A.

Elgetako bidean Uberako eta Izarrek bihurtu eta obretan dihardute. Hori dela eta, trafikoa erregulatuko semaforoak ipini dituzte. Semaforo hauek 45 segundotan behin aldatzen dira, horrela autoak noranzko batean edo bestean bakarrik joateko. Ez dira semaforo arruntak eta argi laranja eta gorria baino ez dute. Beraz, autoak argi laranja dagoenean baino ezingo dira pasatu.

Auto gidariek, ordea, argirik gabe aurkitu dituzte inoiz sema-

foroak. Izan ere, ezezagun batzuek moztu egin dituzte semaforoaren kableak, eta horrek arazoak sortu ditu trafikoa.

Kamioiendako bidea itxita dago, baina asteon kamioi luze bat trabatuta geratu da Izarrek bueltan. Ez da lehenengo kamioilaria pasatzen saiatu eta traban geratu dena.

LAPURRETAK

Bestalde, Ertzaintzatik jakinarazi digute bihurtu eta obretan lapurreta txikiak izan direla azken egun hauetan.

Izarrek bihurtu eta inguruan obretako materiala lapurtu dute, eta ertzainek ikertzen dihardute lapurreta honen nondik norakoak.

Ubera inguruan, berriz, 18 taula lapurtu zituzten astelehenean. Ertzaintza kasua ikertzen hasi eta berehala harrapatu zuten lapurretaren usteko egilea; izan ere, taulak autoan atzeman zizkioten, eta jabearen esku laga berriz ere. Lapurreta txikia izanik ez dute egilea atxilotu eta isunik ere ez diote ipini; baina epai-learen aurretik pasa beharko du.



IBAN ARANTZABAL

Obra amaitu bitartean, uztaile arte, semaforoekin erregulatuko dute trafikoa.

HIRIGINTZA

Elizako tximistorratza berritu egingo dute

I.A.

Elizako kanpandorrean dago herritarrek oinaztuetatik babesteko tximistorratza. Orain, berritzeko erabakia hartu du Udalak, eta kable berria ipintzeaz gain, masta luze bat ere jarriko dute. Berritze lanak abuztua baino lehen egin nahi dituzte.

Segurtasun arauak eskatzen dituzten oinarriak betetzen ez dituelako elizako kanpandorreko tximistorratza berritu egingo duela jakinarazi du Udalak.

Kanpandorrean bertan, goiko partean bi metro luzeko masta ipiniko dute, eta honekin batera kable berri bat, elizako dorretik Artekaleko lorategira joango dena.

Lehen elizara bertara bideratuta zegoen lurrerako lotura linea, eta hori arriskutsuagoa zen.

Berrikuntzak eginda 104 metroko erradioa babestuko dutela aurreikusi dute adituek; beraz, herriko erdigunea oinaztuetatik salbu geratuko litzateke.

Securitecno enpresa arduratuko da berrikuntza lanez, eta 5.145 euroko kostua izango dute. Behin Gobernu batzordeak proiektua onartuta, asmoa da abuztua baino lehen lanak amaituta egotea.

KALTEAK TXIKITU

Alkateak esan digunez, "sarritan izaten dira oinaztuak herrian, eta tximistorratza berrituta, oinaztuak egonez gero aparatu elektrikoak ahalik eta gutxien kaltetzea da helburua".

MUSIKA

Karidadeko Benta taldearen kontzertua gaur Espaloian

I.A.

Karidadeko Benta taldeak kontzertua eskainiko du gaur, bariakua, 22:30ean hasita Espaloian.

Jon Maia bertsolariaren inguruan sortutako taldea da. Bertso batzuk lagun artean musikazetik hasi eta taldea handituz joan da. Orain sei lagunek osatzen dute: perkusioan Imanol Mantrola; klarinetean, tronpetan eta saxofoian Inaxio Tolosa; baxuan eta lauda arabiarrean Jon Manzidor; helikoian eta biolinean Domentx Uzin; eta ahotsetan, Jon Maia eta Aran Santamaria.

MUSIKA AUKERA ZABALA

Karidadeko Bentak bertsoa du oinarrian, eta musika eraginak hamaika; lehen kioskoetan jotzen



GOIENKARIA

Jon Maia bertsolariaren inguruan sortutako taldea da Karidadeko Benta.

zuten orkestra txiki bat bezalako. Ez dago, momentuz, genero baten barruan sailkatzerik, baina giro berezia sortzen dute.

Bi disko dituzte kalean, eta euren musikaz eta ikuskizunaz zuzenean gozatu nahi dutenek gaur dute aukera.



Iraitz Lazkano saritua literatur lehiaketan

Zapatuan banatu zituzten Bergaran Koldo Eleizalde literatur lehiaketako sariak. Ipuinen atalean Iraitz Lazkano elgetarrak irabazi du bere mailako lehen saria *Pepita eta Pepito* lanarekin. Antolatzaileek azpimarratu dute Iraitzek bere amama Bixenta Arrillagarekin elkarlanean egin duela ipuina. Belau-naldiz belau-naldi etxean entzundako ipuin batetan oinarrituz idatzi du Iraitzek lana, amamari jasota, hain zuzen ere. /I.A.

PILOTA

PARTIDUAK

ARETO FUTBOL TXAPELKETA

Maiatzak 28
15:00: Txapela-Fuxion . . . Vicios
16:00: Vicios-Añiketan . . . Txapela
17:00: Isspro-Makanaki . . . Añiketan

PILOTA

Maiatzak 27
21:00: Gorka-Peñas (Kadeteak)
Gero: Merino-Idoate (Kadeteak)
Gero: Errea-Argote (23 urtez azpikoak)
Gero: Olaetxea-Olazabal (23 urtez azpikoak)
Maiatzak 29
11:00: Beroiz-Martin (Kadeteak)
Gero: Iturrioz-Jaka (Kadeteak)
Gero: Rico-Urrutikoetxea (Kadeteak)